

# SELECTÆ EX THEOLOGIA CRITICO-DOGMATICÆ CONCLUSIONES

*Quas sub felicissimis Auspiciis*  
REVERENDI ADMODUM PATRIS

FR. JOSEPHI MARIÆ A GALLIPOLI

Lectoris Emeriti, olim Ministri Provincialis, necnon  
Definitoris Generalis, nunc vero Procuratoris Ge-  
neralis Strictioris Observantiæ S. P. N. Francisci,

PUBLICÆ DISPUTATIONI EXPONIT

P. FR. JOANNES LAURENTIUS A ROMA


Romanæ Provinciæ Reformatæ Alumnus ac Theologiæ  
Facultatis auditor.

*In Templo S. Francisci ad Ripas Tiberis sub assistentiæ  
R. P. Fr. Antonii Francisci a Roma,  
ibidem Sacræ Theologiæ Lectoris.*

Anno 1750. Mense

Die

Hora



ROMÆ M.DCC.L.

Typis S. Michaelis ad Ripam, per Octavium Puccinelli.  
*Superiorum Permissu.*

21111111

CONCISE USIONS

12.11.11

12.11.11

12.11.11

12.11.11

12.11.11

12.11.11

12.11.11

12.11.11



## De Existentia , & Essentia Dei .

### I.



Admittendum esse in rerum natura , ac de facto existere Ens perfectissimum , Deum Opt. Max. , Cæli , Terræque supremum conditorem , & Dominum , nedum ex apertissimis eruitur Scripturarum testimoniis , causarum secundarum contingentia , rerum aspectabilium mirandâ compagine , omniumque Sapientum unanimi consensu , contra insipientes Atheos invictissimè demonstratur ; sed præterea , ex intimo conscientia sensu , atque omnium mentibus ingentia ideâ , veritas isthæc omnibus ratione utentibus , utut efferatis , & barbaris , suapte naturâ se prodit , atque innotescit ,

### II.

Ea propter , splendida hæc propositio = *Deus est* = quâ Divina existentia exprimitur , non solum quoad se , verum etiam quoad nos ipsos considerata , per se nota est , ac manifesta . Quo fit , ut Dei existentiam , ignorantia , ut ajunt , *invisiblem* , nullus ignorare queat . Cum autem quæ Dei sunt , nemo cognoverit ,

A

nisi

nisi Spiritus Dei , nulla creatura consequi valet Divinæ Essentiæ numeris omnibus absolutam, claram, perfectamque ideam . Ut tamen, pro modulo nostro, primum aliquod assignemus prædicatum, ex quo, tanquam ex primigenia radice, reliqua Divina Adtributa emanant, Divinæ Essentiæ primum constitutivum, omnimodam independentiam esse arbitramur .

### III.

Unicus est Deus . Quæ sanè veritas , ex Sacris Litteris, innumeris a Deo patratis miraculis , invictisque a ratione depromptis argumentis demonstrata , usque adeo cordatorum, Hominum mentem persuasit , ut perpetuâ traditione, ab Adam ad nostra usque hæc tempora defluerit . Hanc autem traditionem frustra interrumpere conati sunt , qui ante Christi tempora vixerunt Gentiles Idololatræ , quique, post Christi adventum, in Catholicæ Fidei Cultores debaccati sunt Ecclesiæ persecutores infensissimi , aut qui Valentinianorum, Marcionitarum , ac Manicheorum deliramentis obcœcati, minimè veriti sunt, insanam Politheistarum Sectam, post Evangelii prædicationem instaurare . Illud etiam pro certo adfirmamus, neque Enos , neque Moysen , Politheismi fuisse authores , cum ejusmodi commentum , longe ante Moysen , a Chami Posteris originem traxerit .

### IV.

Quemadmodum alterius Dei consortium excludit Unitas , ita quæ Deo competit omnimoda simplicitas , quamcumque ab ipso removet compositionem ex actu & potentia coalescentem , maximè verò eam spissam, & crassam, quam commenti sunt Antropomorphitæ, Deo humani corporis figuram, & membra tribuentes , quorum errorem jam obsoletum , postremis hisce temporibus recoxit Spinosæ . Deum etenim purum esse, ac simpli-

plicissimum Spiritum; semper docuit Patrum traditio, a qua nec latum unguem deflexerunt Epiphanius, & Audius, imo nec Tertullianus, aut Melito Sardenfis.

## V.

Cùm, perfectissimâ Immensitate præditus sit Deus, rebus omnibus, non tantum cognitione, & virtute, sed etiam essentia intimè præsens efficitur. Ex eo verò, quod infinitâ virtute suâ, nova quædam in Universo opera moliatur Deus, atque perficiat; ipsum, ratione substantiæ suæ, intrinsecæ mutationi obnoxium ineptè arbitrati sunt Stoici quidam Philosophi. Quemadmodum etiam ex eo, quod in Sacris paginis, Deus dicatur mutare sententiam, impiè inferunt Sociniani, in Deo, ratione decretorum, veram mutationem esse adstruendam.

## VI.

Reliquas non moramur Perfectiones, & Adtributa expendere, quæ Divinam Essentiam consequuntur: hoc enim ipsò, quod Deus, Ens sit undequaque perfectum, nulla est excogitabilis perfectio, quæ in Deo, aut formalitèr, aut eminentèr, non sit admittenda: Quâ verò, cum inter se, tum a Divina Essentia, distinctione, secernantur absoluta Dei Adtributa, acerrimis inter se studiis congregiuntur Theologi, nondum (si Superis placet) in scirpo quærentes; cùm, ad catholicum Fidei dogma stabiliendum, abundè sufficiat, omnem, adversus Gilbertum Porretanum, & Joachimum Abbatem, distinctionem verè realem e medio tollere.

## *De Visione Dei .*

### I.

**E**T si ratione naturali, Visionis Beatificæ possibilitas demonstrari nequeat ; hanc tamen possibilem fore, contra Armenos , recentioresque Græcos , luculentissima perhibent Scripturarum testimonia; Quam sanè veritatem minimè in dubium revocarunt Chrysostomus , & Theodoretus . Non eo usque tamen , omnibus facilem , & obviam credimus Divinam Visionem , ut cum Beguardis , & Beguinis adfirmemus, intellectum creatum, secundum naturæ vires, posse Deum adtingere; Lumine siquidem gloriæ, eoque supernaturali, illustrari oportet humanam mentem , ut Deum intueatur, non per speculum , & in enigmate , sed sicuti est , facie ad faciem .

### II.

Cùm ad Beatificæ visionis actum eliciendum , ut partialis causa intellectus creatus concurrat ; perfectior intellectus æquali gloriæ lumine irradiatus, excellentiorem pariter Dei visionem consequitur . Absit tamen , ut oculò corporeò, ne quidem supernaturaliter elevatò, sive ante, sive post universalem carnis resurrectionem , Deum intuitivè videri posse arbitremur ; cui sententiæ minimè refragatus est Augustinus , utut dubius, ancepsque nonnullis appareat . Ex eo autem , quod Beatifica visio , tanquam bonorum operum merces sit reposita , Deum in hac vita nemo vidit unquam , nec Paulus ad Cœlum raptus , nec Moyses , quem fato cessisse credimus , nec Henoch, aut Elias , quos etiamnum superstites defendimus .

### III.

Iustorum meritis cœlestis gloria responderet , adeoque  
pro



5  
pro meritorum ratione, inæqualis pariter Animabus retribuitur beatifica visio, secus ac Stoicorum morbo infectus tradiderit Hæreticus Jovinianus. Quod semel stabilitò catholicò dogmate, alterum illud exploditur ridiculum Anomæorum commentum, quod nimirum, a Beatis in Cœlo regnantibus Divina Essentia omni ex parte comprehendatur: Quippe, etsi Sanctorum animæ Divinam Essentiam, Personas, & Adtributa, imo & Creaturas aliquas, tum præsentés, tum etiam possibiles intueantur in Verbo; pleraque tamen sunt, quæ eorum cognitioni subtrahuntur.

#### IV.

In utroque, tum intellectûs, tum voluntatis actu, amore videlicet, ac cognitione, essentiam reponimus Beatificæ Visionis, quâ inebriantur Justorum Animæ, dummodo iis, pro admisis sceleribus, nihil expiandum supersit, statim ac corporis vinculis exsolvuntur. Hinc, toto cœlo aberrant qui, vel beatificam visionem post diem Judicii differunt, multoque amplius illi, qui fictitium mille annorum Regnum, quò Christus cum Electis in terris sit regnaturus, instaurare contendunt. Firma etenim & inconcussa omni ævò in oppositum stetit Sanctorum Patrum traditio, etiam Hilarii, Ambrosii, Chrysostomi, Augustini, & Bernardi. Quibus minimè refragatus est Joan. XXII. Romanus Pontifex, qui nihil hòc super negotiò ex Cathedra definiens, hanc, in utramque partem suis temporibus agitatham controversiam, intactam reliquit.

## *De Scientia, Voluntate, & Providentia Dei.*

### I.

**R**eperitur in Deo omnis scientiæ plenitudo, quâ se ipsum, tanquam primum, & principale objectum, comprehendit, & reliquas etiam creaturas omnes, & singulas, præsentis quidem, præteritis, & futuras, scientiâ Visionis: Possibiles verò, scientiâ simplicis Intelligentiæ scrutatur, quin ipsum lateant rationabilium creaturarum cordis secreta, & quæcumque etiam levissima peccata. Ultra verò scientiam Visionis, & Simplicis intelligentiæ, tertium alterum non admittimus in Deo scientiæ genus, videlicet Scientiam Mediam a Molina noviter excogitatam.

### II.

Futura omnia libera, & contingenta, sive absoluta ea sint, sive ab aliqua conditione pendeant, certò certius prænoscit Deus, quin, vel ejusdem scientia sit causa rerum effectiva, vel minimum humanæ libertati præjudicium inferatur. Ad ejusmodi autem libera contingenta infallibiliter prævidenda, nec decreto prædeterminanti innititur, nec scientiâ mediâ Divina cognitionis dirigitur, sed decreto concomitanti: ita ut, si liberè futura contingenta, bona sint, hæc in se ipso intueatur Deus, ut affecta concomitanti decreto libero, & efficaci; Absoluto, si sint absolutè futura; Conditionato ex parte objecti, si eorum eventus alicui conditioni sit illigatus.

### III.

Quemadmodum perfectissimò intellectu præditus est  
Deus,



Deus, ita ipsi optima convenit voluntas, quâ, in sui ipsius ineffabilem bonitatem, tanquam præcipuum, & necessarium objectum tendit; ipsas verò creaturas, quas condidit, vult, & amat. Divina bonitas, amore, ut ajunt, effectivô. Porro, etsi simplicissima sit Divina Voluntas in se ipsa considerata; nostrô tamen concipiendi modô, multiphariam dividitur a Patribus, & Scholæ Theologis; scilicet, in voluntatem Signi, & Beneplaciti, Antecedentem, & Consequentem, ut alias divisiones prætereamus, quæ ad laudatas facili admodum negotiô reducuntur.

## IV.

Ipsis etiam, ut ait Augustinus, consentientibus omnium sæculorum Ethnicis, Philosophis, atque Gentilibus, in Deo, rerum omnium accuratissima stabilienda est Providentia, quâ Creaturis suis, utut abjectis, & vilibus, consulens, eas ad certos, præstitutosque fines fortiter, & suaviter dirigat: Quam sanè altissimæ Providentiæ œconomiam, excellentius exercet in ordine supernaturali, erga creaturas ratione utentes; dum eas omnes verâ, propriâ, & sincerrâ voluntate vult salvas fieri, ipsis elargiendo supernaturalia Divinæ Gratia auxilia, quibus possint ad vitam æternam pertingere.

## V.

Præcipua, & nobilior Providentiæ pars, est prædestinatio Electorum, & Impiorum reprobatio. Cum verò duplex sit Prædestinatio, altera ad Gratiam, altera ad Gloriam; primam gratuitam omnino fore, itaut naturæ viribus, nequeat se ad ipsam Homo positivè disponere, & præparare; catholicum est Fidei dogma, contra Semipelagianos ab Ecclesia sancitum. Secus res se habet de prædestinatione ad Gloriam, cujus decretum, certum, & infallibile, vel ante, vel post Hominis prævisa merita, positum fuisse, salvâ Fide, propugnant Scholæ Theolo-

logi. Quod si de Impiorum reprobatione sermo instituat, hanc, ante praevisa peccatorum demerita, cum Calvino statuere, sine impudentia, & temeritate non possumus.

## VI.

Effectus praedestinationis primarii sunt, Vocatio, Justificatio, & Glorificatio: Mala etiam poenae, quinimo & peccatorum permissio, quatenus ad majora bona a Deo ordinari valent, inter praedestinationis effectus recenseri possunt. Ceterum, nullum, sine speciali Dei revelatione, certum esse de sua praedestinatione, catholica Fides docet: Etenim, etsi certus sit, & determinatus numerus Praedestinatorum; hunc ille duntaxat prae-novit, qui gratiam & gloriam dat Dominus. Oportet itaque, ut cum metu, & tremore salutem nostram operemur; nam, quamvis magnus sit Electorum numerus, exiguus valde est, si comparetur cum numero Reproborum.

## VII.

Sunt, qui praedestinationem haeresim, fictitiam, imaginariam, atque imperitorum Hominum oscitantiam, in vulgus sparsam fuisse contendunt: At ejusmodi commentum, ex Adrumetino Monasterio erupisse defendunt Critici melioris notae, quibus profecto & nos adsentimur. Quod autem tempore, hocce monstrum caput extulerit, non modice controvertitur inter Eruditos. Nos vero eorum sententiae subscribimus, qui, nullam fuisse tradunt in Monasterio Adrumeti praedestinationem haeresim Augustino superstiti, nec sub Coelestino I. Rom. Pont. in Galliis fuisse disseminatam: Quinimo, & Gothescalcum ab ejusmodi labe immunem fuisse contendimus; Quamvis temeritatis, & impudentiae, in vera causa defendenda, excusari vix, ac ne vix quidem possit.

De

# De sanctissimæ Trinitatis mysterio. 9

## I.

**A**ugustissimum Divine Trinitatis mysterium, in eo positum est, ut unum Deum in Trinitate, & Trinitatem in Unitate veneremur, neque confundentes Personas, neque Substantiam separantes: Ideoque, tres admittendæ sunt Personæ, non nomine tantum, ut effutiebat Sabellius, & post ipsum Sociniani, sed verè, & realiter inter se distinctæ. Ex quo minimè consequitur, tres etiam extare Substantias, ut perperam commenti sunt Tritheistæ; sed unica duntaxat Natura adstruenda est, atque Essentia, quæ tribus distinctis Personis æque communicetur.

## II.

Usque adeo sublime est, ac humano captui impervium Sanctissimæ Trinitatis mysterium, ut, nec etiam suppositâ divinâ revelatione, positivè demonstrari queat: Attamen hujus revelatio, Judæorum Patriarchis, aliisque Viris sanctissimis, non fuit in veteri Lege denegata: Unde subobscura quædam semper viguit hujus dogmatis traditio inter Hebræorum Legisperitos. Absit tamen, ut Philosophis Ethnicis, atque Gentilibus, ullam vindicemus apertam Trinitatis certamque notitiam: Quæ enim hîc super negotiò, cimeriis involuta tenebris, scriptitarunt, non aliunde, nisi ex Hebræorum commercio hausta supponimus. Ea pariter, quæ circumferuntur Mercurii Trismegisti Opera, aliò Authore post apostolica tempora prodiiisse arbitramur.

## III.

Augustissimæ Trinitatis veritas, ex nonnullis veteris Testa-

B

sta-

stamenti locis, adversus Judæos non obscure colligitur. Quæ verò nobis exhibent Scripturæ testimonia in novo Testamento, peremptoria sanè sunt, atque apertissimè Trinitatis mysterium, adversus omnis generis Hæreticos, demonstrant; signanter verò forma Baptismatis Matt. 28. *ψ. 19. = Baptizantes eos in nomine Patris &c.*, & celeberrimum illud Joan: Ep. 1. cap. 5. *ψ. 7. Tres sunt qui testimonium dant in Cælo &c.* Quod quidem, germanum esse Joannis sctum, non adscititum, neque dolò, vel oscitantia intrusum, cum ex Patrum traditione, tum ex pluribus optima notæ Codicibus invictè conficitur, quicquid in oppositum Sociniani obtrudant. Jure proinde ac meritò, contra eosdem Socinianos, & Remonstrantes, adnumerant Catholici, inter fundamentales Christianæ Religionis articulos, mysterium Trinitatis; cujus aperta cognitio, & professio, sit ad æternam salutem omnimodè necessaria.

#### IV.

Exstitit in aliqua substantia Christus Dominus priusquam ex B. Virgine nasceretur: Æternâ siquidem generatione exivit a Deo Patre, eandem substantiam, eandemque naturam cum eodem Patre communicando, ut ex innumeris Scripturarum testimoniis, & nusquam interruptâ Patrum traditione, ineluctabiliter ostenditur. Jure proinde, Ariana, & Semiariana hæresis fuit ab Ecclesia proscripta, atque a Nicæna Synodo consecrata vox illa = *homousion* = ad exprimendam Divini Verbi cum ingenito Patre Consubstantialitatem. Quoniam verò Heterodoxi, ad impugnandam Christi Divinitatem, quosdam priorum sæculorum Patres, qui ante Ariana tempora floruerunt, conantur in suas partes pertrahere; hanc immeritò inustam fuisse calumniam contendimus Ignatio, Justino Martyri, Athenagoræ, Irenæo, Dionysio Alexandrino, Athanasio, Magno Basilio, Tertulliano, qui omnes rectè de Verbi divinitate senserunt.

Ne-

## V.

Neque etiam Liberius Romanus Pontifex, Arianae hæresis est arguendus; Siquidem primæ duntaxat ( quæ catholicum sensum præseferbat ) non autem secundæ, aut tertiæ Sirmien: si formulæ subscripsit. At Osi Cordubensis Antistitis, viri de Christiana Religione optimè meriti, infelicem lapsum, universus ingemuit terrarum Orbis, utpote cum secundam adprobaverit Sirmiensem formulam, impiam prorsus, atque blasphemam. Num verò in Arianica perfidia extremum clauferit diem? negat Athanasius *Epist. ad solit.* cujus & nos opinioni adsentimur. Tandem, neque ut hæretici traducendi sunt Patres in Concilio Ariminensi congregati, eo quod formulæ sibi ab Arianis oblatae subscripserint; ut enim ipsi ajebant apud S. Hieronymum in Dial. cont. Lucif. = *decepit nos bona de malis existimatio; non sumus arbitrati, Sacerdotes Christi adversus Christum pugnare* =

## VI.

Spiritus Sanctus, vera est, ac per se subsistens Persona, ex Patre, Filioque procedens, Patri, & Filio consubstantialis, ut Scripturarum testimoniis propemodum innumeris, ac Patrum traditione innixa, contra Macedonianos, Eunomianos, cæterosque Pneumatomachos, definivit secunda Constantinopolitana Synodus. Immeritò proinde, de corrupto Symbolo, a Græcis redarguuntur Latini, propter additam particulam = *Filioque* = cum hæc a Patribus, gravissimis de causis adjecta fuerit, ut nimirum Græcorum error, qui longè, latèque grassabatur contra Processionem Spiritus Sancti a Filio, radicitus tandem evelleretur.

## VII.

Duæ, nec plures, nec pauciores admittendæ sunt verè, proprie-

prièque dictæ, Processiones, adversùs Arianos, & Sabellianos. Quemadmodum etiam, quatuor sunt relationes personales, nempe, Paternitas, Filiatio, Spiratio activa, & Spiratio passiva; Quæ formaliter, & ut relationes originis præcisè consideratæ, nullam perfectionem involvunt. Sunt pariter in Deo, ad constituendas Divinas personas, Proprietates personales, quæ relativæ sunt, non absolutæ. Denique, verò, Catholicòque sensu, ad enuntiandum Divinæ Trinitatis mysterium, usurpantur a Theologis voces = *Personæ*, *Hypostasis*, & *Subsistentiæ* =

## *De Divini Verbi Incarnatione .*

### I.

**D**ominicæ Incarnationis altissimum, sacratissimumque mysterium, ita humanæ mentis aciem fugit, ut naturali ratione, positivè nequeat demonstrari: Supposita tamen Divinâ revelatione, & convenientissimum, & possibile fore vindicatur. Quinimo bonis Angelis, Beatisque mentibus, Adamo, cæteris Patriarchis, Prophetis, aliisque Viris sanctitate conspicuis, innotuisse defendimus; Quam tamen notitiam, gravissimis de causis, negavit Deus Dæmonibus, qui circa Christi divinitatem anxii, dubiique fuisse videntur. Plausibilis quoque est eorum sententia, qui Incarnationis mysterium docent, fuisse revelatum nonnullis ex Gentilibus, ex quorum numero minimè excludimus ipsas Sibyllas, quarum famigeratissima de Dominicâ Incarnatione oracula, ut apochrypha, & commentitia omni ex parte haudquaquam sunt explodenda.

### II.

Messiam antiquis Patribus promissum jam diu venisse, huncque non alium esse, quàm Jesum Nazarenum, qui ex Maria Vir-



Virgine natus, Cruci suffixus est sub Pontio Pilato, plurima, eaque luculentissima veteris Testamenti oracula convincunt: Inter quæ, decretoria profecto, ac celeberrima illa duo sunt, Jacob scilicet morientis vaticinium *Gen. 49.* & Danielis Prophetia *cap. 9.* quæ ambo in Christi adventu fuere adamussim completa. Porro in Jacobæo vaticinio, per *Judam*, non sola hujus nominis Tribus, sed tota intelligitur Hebræorum Natio, cum aliquâ tamen singulari Tribûs Judæ prærogativâ; Quemadmodum etiam per *Sceptrum*, non sola Regia, ac Monarchica, sed quælibet suprema Reipublicæ administrandæ Potestas designatur. Ipsæ verò Danielis Annorum ( non Dierum, Olympiadum, vel Sæculorum) Hebdomadæ, inchoandæ sunt, non ab Edicto Cyri, annô ipsius Regni I. aut ab Edicto Darii Histaspis; sed ab eo, quod Regni annô 7. vel 20. tulit Artaxerxes Longimanus.

### III.

Plurima alia, eaque invictissima argumenta, jam peractum Messie adventum commonstrant, Signa videlicet, & circumstantiæ admirabiles, quæ Christi nativitatem aut comitata sunt, vel subsequuta; Miracula item splendidissima ab incarnato Verbo perpetrata; Aggæi oraculum de gloria secundi Templi; necnon ea, quæ de Bethleem scripsit *cap. 5.* Michæas Prophetæ. Quibus omnibus, duo alia accedunt præclarissima testimonia, quæ hanc mirificè veritatem illustrent: Alterum Josephi viri Judæi *lib. 18. antiq. cap. 4.* quod autographum, verèque genuinum esse minimè ambigimus: Alterum Phlegontis Gentilis, Adriani Imperatoris Liberti ex *lib. 13. Olympiadum* depromptum, quod certè de tenebris, quæ in Christi obitu contigerunt, intelligendum esse contendimus.

Na-

## IV.

Natus est humani generis Reparator, expletô quartô Mundi millenariô, juxta Hebraici Textus genuinum calculum: Ejusque verum Natale, integrum quadriennium vulgarem æram præcessit; ideoque accidit VIII. Kalendas Januarias, ut retentum est constantissimâ Romanæ Ecclesiæ traditione. Fuit autem Christus Dominus a Joanne in Jordane, Baptismatis lavacrô donatus, annô ætatis suæ ineunte trigessimô: Cùmque inter Baptismum, ejusque Passionem, tres anni circiter intercesserint, cruci suffixus fuit annô ætatis suæ ineunte 33. Hinc post mortem descendit ad inferos, ac triduô exactô, verô, integrô, gloriosoque corpore a mortuis resurrexit. Tandem in Cœlum ascendens, sedensque ad dexteram Patris, orat, atque interpellat pro nobis, piissimi Mediatoris officium exercens.

## V.

Unica est in Christo persona: Quare B. Virgo, & verè Dei Genitrix est, & Deipara meritô nuncupatur. Hinc jure ab Ephesinis Patribus canonicè damnatus est, atque a sua Sede depulsus Nestorius, qui hocce catholicum Fidei dogma impugnavit: Cujus tamen hæresi, nec Joannes Antiochenus adstipulatus est; nec Cyrillus Alexandrinus in suis Anathematismis (quos Catholicos affirmamus) Nestorium refellens, in oppositum prolapsus est Apollinaris errorem. At Theodoretus, quamvis in fine resipuerit, Nestorio in principio adhæsit; jure proinde, ac meritô, a V. Synodo tria Capitula fuere proscripta. Ipsâ verò Dominicâ incarnatione peractâ, duæ remanserunt in Christo distinctæ, inconfusæ, ac impermixtæ Naturæ, Divina scilicet, & Humana, ut contra Euthichetem sancitum est in Synodo Calcedonensi. Duplex pariter in Christo fuit voluntas, & operatio, secus ac impiè docuerint Monothelitæ, in Constantinopolitano Concilio dam-

damnati : Quibus nunquam suffragatus est Honorius I. Romanus Pontifex, utut grassantem Monothelitarum hæresim, eâ, quæ Summum decebat Pontificem, animi constantiâ, & fortitudine non represserit.

## VI.

Divinum Verbum, veram, & solidam carnem, non umbratilem, aut phantasticam ( ut commenti sunt Marcionitæ ) ex B. Virgine, mirò prorsus ac stupendò modò, operante Spiritu Sanctò assumpsit, perpetuâ videlicet, & inviolatâ permanente Genitricis Mariæ, sive ante partum, sive in partu, sive post partum, virginitate. Hinc veris doloribus, cæterisque communibus humanæ naturæ infirmitatibus, obnoxium fuit Christi corpus : Hancque veritatem constanter docuerunt Clemens Alexandrinus, & Hilarius Pictaviensis. Veram pariter sibi hypostaticè univit humanam mentem, & Animam, voluntate præditam, & intellectu; quæ nedum a primo conceptionis instanti, perfectissimâ rerum Divinarum, & humanarum scientiâ, cumulatissimis gratiarum donis, eximiis virtutibus, atque beatificâ Dei visione fuit illustrata; sed etiam eâ sanctitate cumulata fuit, ut nullum unquam in Christo fuerit, aut esse absolute potuerit vel levissimum peccatum; quin tamen, ejus ad meritum, necessaria libertas vel minimè læderetur.

## VII.

In Christo, ratione Personæ, & in concreto, admittenda est, adversus Nestorium, idiomatum communicatio. Absit tamen, ut etiam sub restrictione humanitatis, Christus nuncupetur Dei Filius adoptivus, & adoptivus; quamvis ipsum, creaturam appellari non repugnet, ratione assumptæ humanitatis. Hinc ejusmodi enunciatio = *Unus e Trinitate passus est carne* = a Monachis Scythis usurpata, catholica est, & orthodoxa. Christus etiam verè peccata nostra portavit, propriò suò sanguine  
nos

nos redemit, ac pro nobis omnibus, sui ipsius in Ara Crucis cruentum obtulit sacrificium, quicquid in contrarium Soci-  
niani deblaterent. Quamvis autem omni ex parte, copiosissima fuerit humani generis redemptio; attamen Christi meritum, in rigore infinitum adstruere haudquaquam audemus: Etsi certo certius arbitremur, juxta præsentem dispositionem, nullam, rationalem creaturam peccato obstrictam, imo nec creaturam quamlibet, quantumvis gratiâ, meritisque exornatam, Deo potuisse pro admissa culpa condignè satisfacere.

## *De Sacra Scriptura.*

### I.

**D**espiciunt profectò Novatores quidam, sub Libertinorum nomine, qui, Swenckfeldio duce, ad rectè, in timore, & tremore Domini, vitam traducendam, comminiscuntur, solùm sufficere lumen naturæ. Admittenda est ergo divina revelatio, a Spiritu Sancto in libris cum veteris, tum novi Testamenti, nobis manifestata, quæ infallibilis regula sit, ad cujus normam, catholicæ Fidei articulos, Morumque disciplinam expendamus. Etenim Sacrarum Scripturarum canonici libri omnes, cum fuerint per Patriarchas, & Prophetas, per Apostolos, & Evangelistas, peculiari Spiritus Sancti afflatu, & inspiratione, conscripti, eos, sive ad sensum, sive ad verba, tanquam a Deo dictatos suscipimus, & veneramur.

### II.

Sacrorum Bibliorum, pro temporum varietate, diversæ emanarunt Versiones: Quas inter, principem sibi vindicat locum, Vulgata nostra, sollicitudine Damasi, & hærculeo planè D. Hieronymi labore, ad perfectionis umbilicum deducta; quæ sola canonica est, atque infallibilis autoritatis: Quamvis etiam ad ulteriorem Sacrarum Scripturarum intelligentiam, multum  
sub-

Subsidii conferant, & Græca, & aliæ etiam Versiones, præcipue verò originalis, ac primigenius Hebraicus Textus, qui illesus, & incorruptus, (si leviora quædam exceperis menda, Amanuensium oscitantia, vel punctorum additione intrusa) ad Christum, ad nostra etiam usque hæc tempora, providentissimò disponente Numine, permansit.

## III.

Duplex est Scripturarum sensus, Litteralis videlicet, & Mixtus: At ex solo Litterali, inconcusse stabiliuntur Fidei dogmata: Nam Mysticus probabilem duntaxat auctoritatem præferet, nisi ad hunc roborandum, vel universalis Ecclesiæ consensus, vel Patrum traditio, vel Romani Pontificis accesserit autoritas. Cum autem ambigua sit, & obscura Sacrarum Scripturarum intelligentia, allucinantur Calvinus, & Lutherus, cæterique id furfuris Novatores, qui, ad Religionis controversias dirimendas, usque adeo omnibus obvium, & facilem commenti sunt Scripturarum sensum, ut cujusslibet spiritu privatus enodari queat: Siquidem, ad genuinum determinandum Bibliorum sensum, vel Summi Pontificis, vel universalis Ecclesiæ autoritas debet intercedere.

## IV.

Ad ipsam pariter Ecclesiam pertinet, de Sacrorum Codicum autoritate ultimum judicium proferre: Hinc justis, gravissimisque de causis, potuit, Sacrarum Scripturarum in linguam vernaculam versiones, & usum interdiceret: Siquidem libros Sacros volvendi necessitas, non omnes ex æquo afficit Christi Fideles, nimirum Sapientes, & Indoctos, ut perperam contendit Quesnellus; sed id muneris Doctioribus præcipue incumbit, necnon Animarum Pastoribus, & Sacerdotibus, ut Divinarum Scripturarum lumine collustrati, noverint inter lepram, & lepram distinguere, & Fidelium Populum ad electa æternæ salutis pascua deducere.

C

Ne

Ne in delectu divinorum Librorum, errandi subsit periculum, eos duntaxat ut Canonicos, & Sacros suscipimus, quos ut tales declaravit Tridentina Synodus *Seff. 4. in Decret. de Can. Script.* Sunt autem isti numerò 72. quorum 45. vetus, alii verò 27. novum Testamentum constant. Hos inter, 22. hebraicus numerat Canon, Esdrâ authore, conscriptus, qui sanè Libri *Protocanonici* nuncupantur: Reliqui verò, qui in aliis Canonibus recensentur, dicti sunt, *Deuterocanonici*: Utrisque tamen eadem infallibilis vindicanda est fides, & autoritas.

## VI.

Inter omnes veteris Testamenti Sacros, Canonicosque libros, primò locò occurrit Pentateuchus, quem, & genuinum, & canonicum esse, & Moyse authore conscriptum, adversus Ricardum Simonium, & Spinofam, ipsis etiam Hebræis, & Samaritanis consentientibus, mordicè tuentur Catholici. Libri pariter Job, Tobia, Judith, Esther, & germanam complectuntur historiam, & inter Sacros, Canonicosque Codices sunt recensendi. Idem est judicium de aliis omnibus Scripturarum libris, qui Majorum, & Minorum Prophetarum nomine circumferuntur: Item de libris Josue, & Judicum: Ac denique de geminis, primò nimirum, & secundò Machabæorum, quibus omnibus firma semper, & inconcussa remansit in Ecclesia autoritas.

## VII.

Ad enervandam Sacrorum Codicum autoritatem, nullum faceffit negotium, quod in captivitate Babylonica fuerint Sacræ Scripturæ corruptæ, & dissipatæ: Elegit siquidem Deus, ut huic incommodo occurreret, Esdram Summum Sacerdotem, virum plenum sapientiâ, zelò, & virtute, qui ad veram in Hebraico Populo Religionem stabiliendam, Divinò adstante Spiritu, plerosque veteris Testamenti libros, solutâ captivitate, collegit, meliorique facie donavit, ipsos a pluribus, quibus scatebant mendis, feliciter expurgando.

A.



A septuaginta Interpretibus, non tantum versi sunt quinque Moysis libri, sed universa Scriptura hebraicè conscripta: Hæc porro versio, quæ omnium prima censenda est, a 72. Interpretibus sub Ptolomæo, non quidem Lagide, sed Philadelpho, non in Cellulis divisim inclusis, sed in una Basilica insimul congregatis, fuisse adornatam, probabilius est, ut docet D. Hieronymus. Versionis autem hujusmodi, quemadmodum etiam Textus hebraici, magna semper fuit, & etiamnum est in Ecclesia autoritas: Quibus profecto, nil præjudicii adtulere Tridentini Patres definientes, Vulgatam nostram, certissimam esse Fidei regulam, nihilque aut bonis moribus adversum, aut catholicæ Religioni dissonum continere.

## IX.

Nedum Sacrosancta quatuor Evangelia, sed etiam canonicas omnes Epistolas, signanter verò illam ab Apostolo Paulo ad Hebræos conscriptam, atque Apocalypsim a Joanne Evangelista adornatam, jure, meritoque in Sacrarum Scripturarum cathalogo esse reponendas, docent, adversus Novatores Heterodoxos, Catholici. Reliquos autem omnes libros (de quibus suspecta fuit semper autoritas, quippe nec in Hebræorum Synagoga, nec in Ecclesia Christi unquam fuerunt recepti) inter apocryphos, omissos, vel supposititios rejicimus, utpote cum nullò canonico, certòque authore prodierint, vel nunquam in Sacrarum Scripturarum Canonem fuerint relati; vel Impostorum malis artibus, & fraudibus, pro legitimis fuerint intrusi.

## De Traditionibus.

## I.

**C**um plurima, non minùs ad Religionis negotium, quàm ad Christianos mores pertinentia, vel in Divinis Scripturis

desiderentur, vel nonnisi subobscurè indicentur, ultra verbum scriptum, admittendum est etiam verbum traditum, seu verà, & legitimæ Traditiones, quibus genuinus Scripturarum sensus Fidelibus evolatur, atque ea, quæ scripta non sunt, significantur. Hinc perperam Fidei nostræ Osiores, ut Traditionum jugum excutiant, solos Scripturarum libros, sufficientem esse Fidei regulam comminiscuntur: Etenim antiquissimus semper fuit Traditionum usus, quibus moderata fuit Ecclesia in Statu naturæ, in Lege Mosayca, ac etiam post Evangelii promulgationem.

## II.

Ad legitimas, verasque Traditiones noscendas, certæ quædam, ac infallibiles a Catholicis subministrantur regulæ, quas inter, præcipua est illa, quâ cautum est, ut nil tanquam Divinâ, & Apostolicâ traditione ratum habeatur, quod communi Ecclesiæ usu, ac sententiâ, receptum non fuerit. Eapropter, nil suffragatur deploratæ Novatorum causæ ridiculum illud effugium, quod ad nauseam usque, Catholicis obtrudit Dalæus; Res nimirum Ecclesiæ, usque adeo temporum varietate fuisse perturbatas, ac susceque versas, ut Divinas ab humanis traditionibus secernere omnino non valeamus.

## III.

Varia sunt Traditionum genera; aliæ siquidem Divinæ sunt, aliæ Apostolicæ, aliæ Ecclesiasticæ, aliæ ad Fidem pertinent, aliæ ad Mores, aliæ perpetuæ sunt, aliæ temporales, aliæ universalem, aliæ particulares quasdam respiciunt Ecclesias: Has itaque omnes, eâ quâ par est reverentiâ, suscipientes, sine scelere, & impietate negligi non posse contendimus, dummodo eò fine, a legitima potestate invecatæ fuerint, & adprobata, ut a Fidelibus observentur.

## IV.

Illud verò discriminis interest, inter Divinas, Apostolicas,

at-

atque Ecclesiasticas Traditiones, quod, Divinæ, nullâ penitus Ecclesiæ autoritate mutari queant: Apostolicæ autem, & Ecclesiasticæ, maxime, quæ ad Morum disciplinam pertinent, variari possunt, prout exigere videntur temporum circumstantiæ, major Dei cultus, Christianique Populi necessitas, & utilitas: Quæ sanè œconomia, ab apostolicis temporibus, ad nostrum usque hoc ævum, in Traditionum usu, firmissimè semper retenta est, ac observata.

## V.

Quandoquidem Verbum Dei, sive scriptò exaratum sit, sive oretenus traditum, Divinæ veracitati (fallere, & falli nescire) innititur; non minori veneratione suscipiendæ a Fidelibus sunt Divinæ Scripturæ, quàm legitimæ Traditiones: Hinc ad Fidei articulos stabiliendos, atque ad Ecclesiasticam disciplinam, sanctè, & immaculatè instituendam, tam infallibilem auctoritatem exhibent veræ, ac germanæ Traditiones, quàm Sacrarum Scripturarum canonici, & genuini Codices.

## De Ecclesia.

## I.



**R** Ejectis spuriiis, ac commentitiis definitionibus, quibus, Ecclesiam Christi sine macula, & absque ruga, describunt cum Veteres, tum Novatores Heretici; rectissimè a Catholicis definitur = *Cetus hominum, ejusdem Fidei Christianæ professione, & eorundem Sacramentorum communione conjunctus, sub regimine legitimorum Pastorum, ac præcipuè Romani Pontificis* = Non ergo constituitur Ecclesia ex solis Hominibus perfectis, nullum peccatum habentibus, ut somniant Pelagiani; aut ex solis Justis, qui circa Fidei dogmata, in aliquod lethale crimen non sunt prolapsi, ut delirant Novatiani; aut ex Probris ab omni graviore culpa innocuis, ut deblaterant Donatistæ;

ne-

neque tandem ex solis Prædestinatis ; ut mordicùs tuentur Wiclephistæ, Lutherani, & Calvinistæ, alique nostrorum temporum Pseudoreformati.

## II.

Hinc ad Ecclesiam spectant Peccatores, Imperfecti, ac Re-probi, siue publici sint, siue privati, non autem Hæretici, & Schismatici, publici, aut occulti, multoque minùs Infideles, & Pagani, alique id fursuris perfidiosi Homines ; qui cùm in Ecclesiam per Baptismatis januam nunquam fuerint ingressi, non solum in Ecclesia non sunt, sed neque de Ecclesia dici possunt. Ipsi verò Excommunicati, etsi quadantenus ab Ecclesia præcisi sint, ipsius tamen Ecclesiæ membra suò modò dici possunt. At Cathecumeni, actù, & perfectè, ad Christi Ecclesiam non pertinent.

## III.

Certis quibusdam characteribus, & notis, vera Christi Ecclesia a quacumque alia illegitima Congregatione scèrni-tur. Has porro notas nobis innuit Constantinopolitana Synodus dum ait = *Credo unam Sanctam Catholicam, & Apostolicam Ecclesiam* = Itaque cùm, ex ipsis Adversariorum principiis, ejusmodi Characteres, Ecclesiæ Romanæ competere faciliè deducatur ; mirum est, quod Hæretici, in hóc Religionis negotiò inter se minimè coherentes, ut ab Ecclesia Romana ( quam cane-pejus & angue detestantur ) recederent, alias substituerint Societates, & Conventicula, ineptis, spurisq;ue notis designata.

## IV.

Visibilis ex natura sua, omniumque oculis conspicua fuit semper Christi Ecclesia : Hinc mentiuntur cum Donatistis Novatores Hæretici, contendentes, ita quandoquidem obscuram fuisse, atque extinctam, ut visibilis amplius non fuerit : Ejusmodi autem visibilitas, ita Christi Ecclesiæ propria est, ac singularis, ut, Societati Catholicorum duntaxat unicè conveniat, non verò Protestantium Conventiculis. Perpetua itidem est Ec-

**Ecclesia Christi, utpote quæ nunquam defecit, nec ullò amplius tempore est defectura.**

## V.

Cùm dubia quædam identidem inter Catholicos suboriantur circa Fidei articulos, Morumque disciplinam, quæ, solis in subsidium vocatis Scripturarum testimoniis, & traditionibus, difficili admodum negotiò possunt eliquari; Judicem aliquem statuere oportet, qui ab omni errandi periculo tutus, quæ Religionis sunt, aperiat, lites de Fide, & doctrinâ exortas componat, ac discordes uniat Fidelium animos. Hic autem Judex esse non potest, neque Privatus spiritus, nec sæcularis Potestas, sed ipsamet Ecclesia Christi, ex legitimis Pastoribus constituta, ad quam, Fideles Oves, ut veritatis magistram, tenentur recurrere, ejusque finali judicio acquiescere.

## VI.

Etenim veræ Ecclesiæ, nedum Passiva, ut nec ipsi dissentiantur Novatores, sed Activa pariter, quam Protestantes inficiantur, infallibilitas convenit: Fieri namque haud potest, ut major pars Episcoporum Romano Pontifici adhærentium, irrepentes propriò calculò confirmet errores, in Religionis negotio; Et si aliter visum fuerit Fidei nostræ Oforibus, perperam ad hanc teterrimam maculam Ecclesiæ inurendam, & acta Concilii Ariminensis, & Episcoporum sententiam, in causa Honorii Romani Pontificis, in medium producentes.

## VII.

Hæc omnimodâ infallibilitate, quâ pollet Ecclesia, citra ullum erroris periculum, de Propositionum sensu, de Librorum doctrinâ, eorumque Authoribus, ultimum, ac decretorium potest judicium proferre; cui, ex animi sententia, intimoque consensu, & adprobatione, est acquiescendum: Hinc jure, meritoque, semper detestata est Ecclesia religiosum illud silentium, quò, ipsius validiores sanctiones, atque decreta eludere conantur.

Hæc

Hæretici, eorumque Fautores, incedentes forinsecus in vestimentis Ovium, cum intrinsecus sint rapaces Lupi.

## De Conciliis.

### I.

**J**uxta vulgatissimam Catholicorum sententiam, rectè definitur Concilium, quod sit = *Cætus Episcoporum, seu Sacerdotum, in certum quemdam locum convenientium, ad dirimendas Fidei, Morum, & Disciplinæ quæstiones* = Soli itaque Ecclesiastici Viri, Summus Romanus Pontifex, Episcopi, Cardinales, & Sacerdotes, locum obtinent in Conciliis: Ad quæ, nullo jure vocandi sunt Laici, quacumque doctrinâ, vel autoritate præditi; sive etiam Imperatoriâ, vel Regiâ Majestate fulgentes, nisi eorum præsentia, necessaria, vel utilis foret, ad consilia præbenda, vel ad eas compescendas discordias, & lites, quæ in Conciliis quandoquidem solent oriri.

### II.

Non minùs saluberrima, quàm antiquissima est Conciliorum institutio, utpote quæ jam ab Ecclesiæ primordiis fuit ad usum revocata. Sunt autem quatuor Conciliorum genera; alia etenim sunt Generalia, alia Nationalia, alia Provincialia, Diæcesana alia. Ut Concilium Œcumenicum sit, & Generale, necessariò requiritur, quod hujus celebrandi notitia ubique propagetur, nullusque totius Universi Catholicus excludatur Episcopus. Verùm, ad Nationalia celebranda Concilia, soli cujusdam certæ Nationis convocantur Episcopi: Quemadmodum etiam Concilia Provincialia, celebrantur alicujus Provinciæ Episcoporum, & Sacerdotum præsentia: Diæcesana verò, ex Episcopo, & Sacerdotibus illius Diæcesis.

### III.

Jus celebrandi, ac convocandi Generalia Concilia, ad  
fo-



solos pertinet Romanos Pontifices, non verò ad Imperatores, Reges, & Principes, aliasque laicas Personas, quacumque Majestate præfulgeant. Ejusmodi autem convocatio, sufficit ut virtutis sit, vel implicita, in casu quod non habeatur expressa; videlicet, quod Summus Pontifex non contranitur, aut ejusdem Concilii acta confirmet. Non ergo, ut Œcumenicum recipimus Pisanum Concilium, ad extinguendum celebre Schisma inter Gregorium XII., & Benedictum XIII., annis 1409. celebratum; cum nec ab ullo Romanorum Pontificum congregatum fuerit, nec adprobatum.

#### IV.

Ipsis etiam Romanis Pontificibus jus competit in Conciliis per se, vel per suos Legatos præsidendi. Quod si quandoquidem absente Pontifice, ut Ecclesiæ acta testantur, inter Concilii Patres Imperatoribus eminentior assignatus est locus, hoc ideo effectum est, ut, quoad materiale locum, amplior Imperatoris Majestati honos deferretur, non verò quod unquam in Concilium Imperatores, & Reges, velut Judices, aut Præsides fuerint admissi.

#### V.

In omnibus Conciliis, Divinò jure, ultra Romanos Pontifices, interveniunt nedum ut Consiliarii, sed etiam ut veri Judices, Catholicæ Ecclesiæ Episcopi. Reliquæ pariter Ecclesiasticæ Personæ, ex privilegio, & per vetustâ consuetudine admittuntur, nimirum Cardinales, Prælati, Ordinum Generales, aliique pietate, & doctrinâ Viri conspicui, Imperatoris, Regum, & Principum Oratores; quinimo, & ipsis quandoquidem indulgetur Hæreticis, ut coram Concilii Patribus & causam dicant, & Fidei rationem reddant, ipsis, etiam si opus fuerit, permisso Salvoconductu; quem, perperam in causa Joannis Hus, & Hieronymi a Praga, fuisse a Concilio Constantiensi violatum, calumniantur ipsimet Heterodoxi.

D

Om-

Omnia Ecclesiæ Concilia ineluctabilem obtinent auctoritatem , & omnimodâ infallibilitate prædita sunt , dummodo Romani Pontificis legitima adprobatio accedat . Secus si ista deficiat . In hoc enim casu , probabile duntaxat exhibent argumentum : imo etiam nullum , si eorum Statutis , Petri Cathedra adversetur . Est autem absolutè necessarium , quod in Ecclesia , aliqua celebrentur Concilia , urgente potissimum Schismatis necessitate . At necesse haudquaquam est , quod hæc Concilia , potiùs Generalia esse debeant , aut Nationalia , aut Provincialia , aut Dioecesana , quamvis hæc omnia utilissima sint , ut suaviori modò veritas Fidelibus insinuetur .

## *De Romano Pontifice .*

### I.

**C**Um ad solum Romanum Pontificem , non verò ad Episcopos , & Sacerdotes , ut somniant Lutherus , & Calvinus , multoque minùs ad sæculares Reges , & Principes , ut Schismatis Anglicani Fautores comminiscuntur , Dei Ecclesiam Divinò jure pertineat regere , & moderari , invictè conficitur , quod excellentissimum sit Ecclesiæ regimen , Monarchicum videlicet , & Aristocratia nullatenus temperatum ; Quod a Christo , soli Petro collatum fuit , ejusque legitimis Successoribus .

### II.

Eapropter , Primatus , tum honoris , tum jurisdictionis , ad rectè instituendum Ecclesiæ gubernium , Petro concessus , ita fuit illi proprius , & singularis , ut ab ejusdem participatione , nedum reliqui Apostoli fuerint exclusi , sed ipsemet etiam Paulus : Ideoque , cum Christus Dominus , Petrum Apostolorum omnium , & Ecclesiæ caput , ac fundamentum consti-

stituerit; ipse supra reliquos Apostolos sive seorsim sumptos, si-  
ve simul, etiam in Conciliis congregatos, omnimodam jurisdic-  
tionem, & auctoritatem obtinuit: Quæ profectò excellen-  
tissima prærogativa, cum per Petrum in omnes Romanos  
Pontifices descenderit, Episcopi omnes, etiam insimul accepti,  
omnimodam Petri Successoribus tenentur obedientiam præ-  
stare, sive in iis, quæ ad Fidem pertinent, sive in iis, quæ  
Ecclesiasticam disciplinam concernunt.

Inter reliqua privilegia Petri a Christo collata, & per  
Petrum in suos legitimos Successores transfusa, principem  
sibi vindicat locum infallibilitatis prærogativa, itaut Romanus  
Pontifex ex Cathedra loquens, & aliquid vel circa Fidem, vel  
circa Mores, vel circa Sanctorum Canonizationem, toti Eccle-  
siæ, tanquam ejus universalis Ductor proponens errare omni-  
no non possit. Itaque Summorum Pontificum ex Cathedra Ec-  
clesiam docentium, firmissimæ esse debent Sanctiones, atque De-  
creta omnia: Ad quæ infringenda, prævalere haudquaquam  
potest Generale Concilium: Ideoque non sine manifestâ im-  
pietate, a Pontificum Decretis, ad futurum Generale Concilium,  
interponitur appellatio.

#### IV.

Quoniam verò, Pontificiæ infallibilitatis Osores, ex Roma-  
nis Pontificibus plures in scenam proferunt, quos criminantur  
in apertas hæreses fuisse prolapsos; nos e converso, omnes ab in-  
justissima calumnia vindicamus: Signanter verò Victorium I.,  
Marcellinum, Liberium, Honorium I., Siricium, Innocentium I.,  
Zosimum, Formosum, Stephanum, Sergium, Joannem XXII.,  
qui omnes, Fidei depositum immaculatè servarunt, ac ad-  
versus quascumque impiorum hominum persequutiones,  
violentias, & fraudes, Ecclesiæ causam, usque adeo imperterritò  
animò defenderunt, ut portæ Inferi, nunquam adversus Pe-  
tri Cathedram prævaluerint.

Certum, indubitatumque est, quod Romæ Petrus fuerit, ibique Sedem fixerit, atque Episcopatum nunquam dimiserit, nisi eò tempore, quò, jubente Claudio Nerone, securi percussus, Romanam Ecclesiam in Fidei confessione propriò sanguine collustravit. At non adeo facile est definire, quò præcisè annò Romam Petrus accesserit. Varias tamen inter sententias, quæ hòc super negotiò circumferuntur, ea nobis arridet, quæ ab Eusebio stabilita, a plerisque Criticis, eruditionis famâ longè clarissimis, plenius illustrata est; videlicet, secundò Claudii Imperatoris annò, Petrum, Christianam Fidem unà cum Sede sua, statuisse in principe Orbis universi Civitate.

## VI.

An Fide divinâ certum sit, Summum Pontificem in terris Regnantem (quem diu sospitem, & incolumem servet Deus) verè, & canonicè fuisse ad Pontificatus apicem evectum? ambigunt nonnulli. Nos adfirmativam sententiam amplectimur, utpote veritati, ac Religioni magis consentaneam. Quâ semel stabilitâ hypothesi, suapte naturâ corrui putidum sanè Joannæ Papiſſæ commentum, a perfidiosius Viris, malè coherentibus laciniis assutum, quod profectò, usque adeo Æsopi fabulam redolet, ut, nedum Catholicis, sed ipsis pariter Hæreticis, jam nauseam, & stomachum moveat.

## *De Sanctis Ecclesiæ Patribus.*

## I.

**S**ANCTOS Ecclesiæ Patres (illos nimirum, quos doctrinâ, & sanctitate conspicuos, in rebus Fidei, & Morum disciplinâ, tanquam Magistros, & Duces venerata est Antiquitas) alii, plus æquò extollunt; alii, impudenti temeritate contemnunt,

nunt , & deprimunt . Ut ergo in librandâ eorum authoritate, securô tramite incedamus, has præcipuè leges, ex gravissimis Authoribus excerptas, cum Melchiore Cano statuimus . Et primò quidem , in rebus , quæ , neque ad Fidem , neque ad Mores pertinent , sed ad eas facultates , quæ naturali lumine comparantur ; tanti ponderis est Patrum authoritas , quanti facienda est ratio , quæ ab ipsis fuerit assignata .

## II.

In iis verò , quæ , ad Sacrarum litterarum interpretationem, Fidei dogmata , & Morum disciplinam spectant ; si quidam duntaxat ( reliquis non reclamantibus , qui controversiam ex professo non pertractaverint ) aliquam sententiam doceant ; probabile quidem subministrare potest veritatis argumentum , firmum verò non potest . Ino , etsi etiam plures in eandem opinionem concedant , alii verò licet numerò pauciores contranitantur ; eorum authoritas , justæ authoritatis limites non excedit . Quod si omnes , aut ferè omnes , unò etiam , vel alterò , aut perpaucis exceptis , in aliquo Fidei articulo tradendo , aut Sacrarum Scripturarum textu exponendo , conveniant ; certam, inconcussam, atque infallibilem traditionem stabiliunt , cui refragari, sinè impietate non possumus .

## *De Actibus humanis .*

### I.

**P**ER actum humanum, illam Hominis actionem intelligimus , quæ a voluntate deliberatâ procedit . Ut ergo humanus actus moralem bonitatem , vel malitiam involvat ; & a ratione dirigi debet , & in ipso Operante libertatem præsupponere . Ita elicitî humani actus , ab Objecto, Circumstantiis , &

& Fine, propriam bonitatem, vel malitiam depromunt, præcipuè verò ex Objecto, ex quo formaliter, & intrinsecè specificantur. Cum autem in Objecto, Circumstantiis, & Fine, quatenus ab Operante attinguntur, nulla quandoquidem inveniatur bonitas, vel malitia, nedum in specie, sed etiam in individuo, admittendi sunt actus humani indifferentes, qui videlicet, in genere Moris, nec boni, nec mali sunt, nec laude digni, nec vituperiò.

## II.

Perseverat in Homine, etiam in statu naturæ lapsæ, liberum voluntatis arbitrium, quod verè activum est, non autem merè passivum: Quod, ut ad merendum, vel demerendum in Homine viatore sufficiat, solutum esse oportet a quacumque necessitate, & coactione, & præditum esse, contradictionis, ut ajunt, libertate. Quod si metu circumveniat humana voluntas, minuitur quidem in actione, quæ consequitur voluntarium, sed non penitus destruitur. Idem dicendum de titillante concupiscentiâ, saltem in ordine ad circumstantiâs spectatâ. Denique, in actibus imperatis, prementem adeo violentiam, pati potest liberum Hominis arbitrium, ut involuntariæ simpliciter reddantur ejus actiones. At in Actibus elicitis, a nemine, neque a Deo ipso, potest humana voluntas, absolutam violentiam experiri.

## III.

Qui ex conscientia operatur invincibiliter erroneâ, nullam incurrit peccati inlicitiam; imò conscientia invincibiliter erroneâ quisque se conformare tenetur. Hinc ignorantia antecedens; tam juris, quam facti, actionem reddit simpliciter involuntariam: At perseverante conscientia, tum positivè; tum negativè dubiâ, nemini, citra peccatum, licitum est



est operari. Qui ergo circa actus honestatem dubius hæret & anceps, gravissimis ex utraque parte militantibus rationum momentis, aut partem tenetur eligere tutiorem, vel ab omni penitus actione cessare.

## IV.

Opinioni tenuiter probabili adversus legem morigerari, iniquum est; Atque illicitum est pariter, opinionem sectari libertati faventem, minusque probabilem, in concursu tutioris insimul & probabilioris. Quod si æquè probabiles sint opiniones, quarum altera Legi faveat, altera libertati; tutior est omnino tenenda. In casu tamen, quod opinio, quæ libertati favet super alteram, quæ stat pro Lege, satis notabilem præferat probabilitatis excessum, ea erit tutissima Morum regula, quam sine piaculo quisque potest tenere.

## V.

Tum ex Sacrarum Scripturarum luculentissimis testimoniis, tum ex Patrum vetustissimâ traditione, adversus Hæreticos solidissimè demonstratur, admittendum esse Originale peccatum, quod in omnes Adæ Posterios (si immaculatam excipias Christi Matrem, & Virginem) seminali propagatione derivatur. Hujus autem peccati natura, non in morbida qualitate, multoque minus in titillante concupiscentiâ, aut fomite ad malum inclinante consistit, sed in privatione Justitiæ originalis, & Gratiæ sanctificantis debitæ. Hôc peccati genere polluti nascuntur Infantes, qui, si ante susceptam Baptismatis gratiam, ex hac vitâ decedant, solâ punientur in altero sæculo poenâ damni, non autem ignis: Hocque verum est, tum ante, tum post universale Judicium.

## VI.

Ultra peccatum Originale , alia admittenda sunt peccata Personalialia , quorum formalis essentia , ac malitia, in privatione reponenda est conformitatis ad Legem . Hæc inter se æqualia minimè sunt , sed gravitate , numero , & specie differunt ; hinc alia mortalia sunt , alia venialia . Specifica peccatorum distinctio , ex Objecto , vel diverso modo , quò in idem fertur humana voluntas , præcipuè depromitur ; Numerica verò , a multiplicatione actuum , vel objectorum . Mortale autem peccatum , per hoc a veniali distinguitur , quod , illud , privatio sit rectitudinis necessariæ ad Deum consequendum ; istud verò , privatio rectitudinis duntaxat utilis ad eundem finem . Dantur etiam peccata puræ omissionis . Omnium denique peccatorum , vera , & effectiva causa , est humana voluntas , advertens actualiter , vel interpretativè , ad id quod facit : Ideoque peccatum philosophicum rejicimus , ut commentum veræ pietati exitiosissimum . Ac tandem , Hæreticorum detestamur impudentissimam temeritatem ; qui , Deum infinitè bonum , peccatorum efficientem causam , & authorem asserere non reformidant .

## VII.

Cum , Divinis , humanisque legibus , rectè ordinentur actiones Hominum ; instituti ratio exposcit , ut selectiora de Legibus theoremata persequamur . Lex itaque distinguitur in æternam Naturalem , Divinam , & Humanam : Lex autem naturalis , cum concipiatur ut radius quidam Legis æternæ , hominum animis impressus , quid agendum sit , quidve fugiendum præscribens ; ea omnia , quæ naturali Lege præcipiuntur , neque a Deo ipso verè mutari , aut per rigorosam epikejam relaxari , vel dispensari possunt . Inest pariter Legis  
na.

naturalis omnibus ratione utentibus cōgnitio; unde circa prima, & universalia juris naturæ principia, atque ea, quæ ex hisce principiis immediatè consequuntur, nulla datur ignorantia verè invincibilis, quæ Hominem a peccato excuset.

### VIII.

Lex positiva Divina, ea omnia comprehendit, quæ Deus liberè nobis præcipit, vel prohibet; atque in Novam, & Veterem dividitur. Vetus, tria præceptorum genera complectebatur, Moralia scilicet, Cærimonialia, & Judicialia. Porro hujus Legis obligatio cessavit post sufficientem Evangelii promulgationem: Non proinde tamen, statim ac mortua fuit, Lex vetus cæpit esse mortifera: Hinc legalia ab Apostolis quandoquidem observata sunt, ut docet Augustinus, = *non simulatione fallacia, sed compassione misericordiae* = Ea propter certò certius arbitramur, Paulum restitisse in faciem Caphæ (quem, alium a Petro perperam quidam existimant) non fictè, ac simulatè, sed verè; eumque ex animo reprehendisse, quia cogebat Gentes judaizare.

### IX.

Humanas leges condere possunt Superiores legitimi, tum Ecclesiastici, tum Sæculares: Quæ si sufficienter fuerint promulgatæ, Subditorum conscientiam obligant, etsi a Populis minimè fuerint acceptatæ. Ad legum autem observantiam, etiam Principes absoluti, saltem quoad vim directivam, tenentur: Clerici quoque adstringuntur Principum temporalium Legibus morigerari, dummodo ejusmodi leges, Ecclesiasticæ immunitati non adversentur. Quod si quis in alienam se conferat Provinciam, subditur Territorii legibus, in quo versatur. Obligant pariter quandoquidem humanæ leges cum periculo vitæ, aut gravissimi incommodi, quamvis com-

E

mu-

muniter hanc rigorosam obligationem non inducant . Porro , Leges omnes humanæ cessant per revocationem , aliamque Legem contrariam , quæ statuatur a Principe ; per Privilegium ; per Consuetudinem ; & per legitimam Dispensationem , iustis videlicet intervenientibus causis ; quæ si deficiant , illicita semper est dispensatio , non tamen invalida , si ab ipso Legislatore concedatur .

## *De Sacramentis in genere .*

### I.

**S**acramentum , cujus vel ipsum nomen impiè detestantur Hæretici , licèt antiquissimum sit , & pro signo rei Sacræ , præsertim verò invisibilis Gratiæ , pervetustâ Ecclesiæ consuetudine usurpatum , optimè a Catholicis definitur = *Invisibilis gratiæ signum sensibile , divinitus institutum , Et Christi nomine , Sacroque ritu exhibitum , Et hominum sanctificationem efficiens* = Cujus equidem definitionis priora verba , Veteris , ac Novæ legis Sacramentis ex æquo conveniunt ; posteriora verò , indicant utrorumque discrimen . Hinc explodendæ omnino sunt spuria Hæreticorum definitiones , quæ , cum , Sacramentis vim omnem , & efficaciam adimant , ipsorum pariter Sacramentorum , ad producendam gratiam , naturam labefactant , & destruunt .

### II.

An in statu innocentia extiterint Sacramenta , necne ? solidè non revincitur , nec demonstratur invictè ; quamvis cum illo statu , nullam fanè dicerent repugnantiam . At in lege Naturæ , & Mosaycâ , tam pro Parvulis , aliquod gratiæ signaculum , quàm pro Adultis , extitisse quædam Sacramen-

ta

ta censemus . Inter quæ primò locò occurrit Circumcisio , quæ ab Abrahamo omnium primò, Dei jussu ad usum revocata, nedum data fuit in signum distinctivum seminis Abrahamæ a reliquis mundi Nationibus , sed ad delendum originale peccatum . In Lége autem Gratia, septem sunt Sacramenta , nec plura , nec pauciora , quibus accensenda haudquaquam est , pedum lotio , quæ nec Sacramentum est , nec ad baptismatis Sacramentum essentialiter pertinet . Hæc omnia Sacramenta fuerunt a Christo immediate instituta ; ac singula Rebus perficiuntur, tanquam Materiâ ; Verbis tanquam Formâ ; quas immutare, non est penes Ecclesiæ potestatem , cum omnium novæ legis Sacramentorum Materiam , & Formam, Christus Dominus non solum in genere ; sed etiam in specie determinaverit .

III.

Verba , quæ Sacramentorum formam constituunt , nec promissoria sunt , nec concionatoria ; sed verè consecratoria . Nefas est autem , in Sacramentis conficiendis , uti materiâ dubiâ, vel duntaxat probabili . Quod si in materia, vel forma, essentialis mutatio contigerit, irritum, & prorsus nullum efficitur Sacramentum ; Secus si ejusmodi mutatio fuerit accidentalis . Licitum quandoque est , in Sacramentorum administratione uti formâ conditionali , cujus tamen usus, ante VIII. Christiani nominis sæculum, minimè obtinuit .

IV.

Omnium Sacramentorum ordinarius Minister, est solus Homo viator : At extraordinariâ potestate, Sacramenta possunt validè administrare , & conficere, etiam Angeli , & Beati in Coelo regnantes . Ut valida sint Sacramenta , requiritur in Ministro intentio saltem virtualis faciendi quod

facit Ecclesia . Ideoque irrita sunt , & nulla , Sacramenta irritorè , & mimicè collata : Nec eam putamus intentionem sufficere , quâ Minister intendat duntaxat ritum externum ferriò peragere , geratque interim in animo, non faciendi rem Sacram, latentem deliberationem . Denique, valet quodlibet Sacramentum, ab impio quoque Hæretico, scelestissimoque Homine collatum , dummodo nihil eorum desit , quæ ad illius constitutionem sunt necessaria, scilicet Materia, Forma, & Intentio .

## V.

Ea, quæ inter Stephanum Romanum Pontificem , & inclytum Martyrem Cyprianum , agitata est acerrima controversia, de validitate Baptismatis collati ab Hæreticis , nullam inter ipsos scissuram induxit , sed vicit pax Christi in cordibus eorum . Etenim , ita Stephanus Cypriano , aliisque novitatem inducentibus restitit , ut intra minas excommunicationis tantum hæserit ; Cyprianus verò , ita baptizatos ab Hæreticis, rebaptizandos esse censuit , ut tamen ab iis , qui eosdem non baptizabant, abstinendum esse non judicaverit . Ex quo conjicere pronum est , Cyprianum, in eâ fuisse opinione defixum , ut hanc putaret questionem, ad meram Ecclesiæ Disciplinam pertinere , quamvis oppositum sentiret Stephanus . Fuit autem in plenario Concilio ejusmodi controversia penitus eliquata ; quod, equidem Concilium, minimè fuisse putamus, vel Alexandrinum, aut Capuanum, vel Nicænum I., aut Constantinopolitanum I. ; sed Arelatense I., annò 314. celebratum .

## VI.

Pro solis Hominibus viatoribus, juxta præsentem rerum ordinem, Sacramenta omnia sunt instituta . Ut verò Adulti Sacramenta percipiant, requiritur in ipsis, ultra alias dispositiones, saltem intentio interpretatiya, in iis præcipuè Sacramentis

tis, quæ imprimunt characterem. Effectus autem præcipuus Sacramentorum, est gratia sanctificans, quæ ab omnibus novæ legis Sacramentis, moraliter, & ex opere operato producit. Alter Sacramentorum effectus, est character in præfenti, & in futuro sæculo indelebilis, quem imprimunt tria Sacramenta, quæ iterari non possunt, nimirum, Baptismus, Confirmatio, & Ordo. Infunditur etiam per Sacramenta, alia peculiaris gratia, quæ Sacramentalis nuncupatur in jure quodam ad certa quædam recipienda auxilia consistens. Tandem, ad convenientem, & debitam Sacramentorum administrationem, servandæ sunt piæ cæremoniæ ab Ecclesiâ præscriptæ, quæ sacras, ac mysticas significationes completuntur; nihilque redolent superstitionis, & vanitatis, ut impiè criminantur Hæretici.

## De Baptismo.

### I.

**S**acramentum Baptismi, quod inter novæ Legis Sacramenta commendari haud satis potest, cum prima sit post naufragium tabula, & janua cæterorum, a Cathéchismo Concilii Tridentini part. 2. num. 5. rectissimè definitur: *Sacramentum regenerationis per aquam in verbo, idest cum expressa invocatione S. S. Trinitatis.*

### II.

Sacramentum hoc ante Passionem suam Christus instituit: verum quo nam præciso tempore incertum est. Id unum certò adfirmari posse videtur, illud non fuisse institutum.

an-

antèquam Christus in Jordane baptizaretur a Joanne. Neque verò cum hoc Sacramento comparari potest Baptismus ipsius Joannis, quem a Baptismo Christi secernere multi perperam recusarunt.

### III.

Materia remota hujus Sacramenti est solæ aquæ naturalis, seu elementaris: neque ullus potest casus accidere, in quo ea possit immutari. Materia proxima est externa corporis ablutio per aquam facta, & licet ablutio hæc primis Ecclesiæ seculis per trinam immersionem fieri consueverit, nemo tamen sit, qui arbitretur, trinam immersionem ad substantiam Baptismi pertinere, cum multis jam ab hinc seculis sola infusione baptizet Ecclesia Latina.

### IV.

Perfecta, & absoluta forma hujus Sacramenti verbis his continetur: *Ego te baptizo in nomine Patris, & Filii, & Spiritus Sancti*. Ac prorsus irritum esset Sacramentum tribus divinis Personis non explicitè nominatis. Hinc non valere, nec unquam valuisse arbitramur Baptisma in solius Christi nomine collatum.

### V.

Lex Baptismi utpote positiva obligare non ante cœpit, quam promulgatum solemniter fuerit Evangelium: Post sufficientem verò ejusdem promulgationem Baptismus non adultis modo, veram etiam parvulis necessarius est necessitate mediæ.

Ba-



Baptismus tamen aquæ, seu fluminis suppleri martyrio potest, quod vocant Baptismum sanguinis: immo in adultis etiam baptismo fluminis, charitate scilicet cum voto Sacramenti.

## VI.

Valet Baptismus ab Hæreticis ritè collatus: immo homo quilibet viator est hujus Sacramenti Minister, ut inquit, *a necessitate*. Illius tamen ordinarii Ministri sunt soli Episcopi, & Presbyteri. Valet etiam Baptismus parvulis ante usum rationis administratus: quinimmo expedit illos tunc temporis baptizari. Non licet tamen præterquam in manifesto vitæ discrimine filios infidelium invitis eorum parentibus sacro fonte lavare.

## VII.

Varii sunt effectus Baptismi, per quem filii Dei effici-mur, membra Christi, hæredes Dei, cohæredes autem ipsius Christi, ac indelebilis præterea Animæ character imprimitur, ratione cujus baptismus semel ritè susceptus iterari nequit. Principem inter hos tamen locum tenet gratia sanctificans, peccata omnia ante baptismum admissa verè, ac propriè delens. Quod si in hæresi, vel schismate, aut etiam in Ecclesia ipsa Catholica baptismus fictè suscipiatur, præcedentia peccata non statim, sed recedente fictione remittuntur.

## De Pœnitentia.

### I.

**P**œnitentia ( quæ variis nominibus a Conciliis, & a Græcis, Latinisque Patribus, signanter verò = *secunda post naufragium tabula* = rectissimè appellata est ) virtus est moralis a Deo infusa, inclinans peccatorem, ad proprii peccati detestationem, cum efficaci emendationis, & satisfactionis proposito. Unde Pœnitentiæ virtus, nec simplex est resipiscentia, nec nudam a peccato cessationem, aut purum novæ vitæ desiderium importat, sed etiam dolorem de admissâ in Deum noxâ, & peccatò. Fuit autem ejusmodi virtus, ad impetrandam culpæ veniam, quocumque tempore peccatoribus necessaria, necessitate tum mediæ, tum præcepti, quod sanè præceptum, post admissam culpam statim peccatorem non obligat, sed sæpius duntaxat in anno, & in certis quibusdam occasionibus, potissimum verò in mortis articulo.

### II.

Est autem Pœnitentia, verum ac proprie dictum Novæ Legis Sacramentum, post baptismum lapsis ad salutem omnino necessarium, atque ab ipso Baptismate planè diversum; quod a Christo Domino immediate institutum est, cum a mortuis resurgens, insuflavit in Discipulos suos dicens = *accipite Spiritum Sanctum, quorum remiseritis peccata &c.* = Porro, tanta est hujus Sacramenti virtus, & efficacia, ut non solum Sacramentali absolutione, coram Deo declarentur peccata esse remissa, sed verè ac penitus remittantur, quin ullum detur peccatum, & crimen, utut enorme, ac longè gravissimum, quod nequeat per pœnitentiam expiari, ac judiciariâ Sacerdotum potestate ab Ecclesia remitti.

Non

## III.

Non Originalis culpa, sed peccata actualia, tam mortalia, quam venialia post Baptismum admissa, sunt Materia remota Sacramenti Pœnitentię; illa quidem necessaria; hæc autem sufficiens, & libera. At essentialis partes, quibus hoc Sacramentum, immediatè, & tanquam ex Materia proxima constituitur, non sunt aut manus impositio, aut Sacramentalis absolutio, ut Theologorum aliquibus visum est; nec terrores conscientis incussi, agnitio peccatò; nec Fides per Evangelium excitata, ut contendit Lutherus; nec vivificatio, & mortificatio, ut docet Calvinus; sed tres Pœnitentis actus, nimirum, Contritio, Confessio, & Satisfactio.

## IV.

Ad Contritionem quod adinet, hæc, vera, interna, & supernaturalis esse debet, atque ad omnia patrata scelera se extendere, necnon peccati odium, meliorisque vitę propositum involvere. Ea verò sententia, quę, amoris initialis necessitatem, ad gratiam in Sacramento pœnitentię obtinendam, propugnat, pia est, ac summò opere commendabilis, utpote quę, nullà a Tridentino Concilio censurà notata est; imò Hæreticorum doctrinę ex diametro opponitur, Sacrarum Scripturarum authoritati, & Patrum traditioni innititur, ac demum validissimis Theologicis argumentationibus roboratur. Nec enim Tridentina Synodus unquam definivit, attritionem ab amore initiali sejunctam, ad gratiam in Sacramento pœnitentię consequendam sufficienter disponere.

## V.

Sacrarum litterarum authoritate, Majorum traditione, atque ex vetustissimo Ecclesię usu, Divinum Sacramentalis Confessionis præceptum invictè demonstratur. Quod sane non evertitur ex celebri Nestorii factò, sed magis magis.

gisque fulcitur . Itaque , ad salutem consequendam , non perutilis tantum , verum etiam prorsus necessaria est Sacramentalis Confessio . Porro in hac , omnia enumeranda sunt lethalia crimina , quorum occurrit memoria , uni , eidemque Sacerdoti ; cui mortalium culparum , nedum species , & numerus debet exactè aperiri , sed etiam circumstantiæ speciem mutantis , & intra eandem speciem notabiliter aggravantes . Secretò perficienda est ejusmodi Confessio ; quod si quandoquidem priscis sæculis , ob contritionis vehementiam , publicè enuntiarunt aliqui peccata sua ; nullâ tamen , aut Divinâ , aut Ecclesiasticâ lege adigebantur Poenitentes ad palam aperienda , quæ occultè patraverant . Ea verò Confessio , quæ legitur quandoque facta per litteras , Sacramentalis haudquam fuit : Hinc Clemens VIII. dum Decretò suò anni 1602. illicitam , & invalidam declaravit , tum Confessionem per litteras , tum absolutionem absentibus datam , firmissimè retinuit quod fuit a Majoribus traditum .

## VI.

Episcopi duntaxat , ac Presbyteri , Sacramentum Poenitentię possunt administrare ; ideoque Exomologesis per Diaconum data , aut confessio , quam nonnulli in exitu vitę Laicis fecerunt , non fuit Sacramentalis . Ut tamen Sacerdos validè absolvat , exceptò mortis articulò , utrâque præditus esse debet Ordinis , & Jurisdictionis potestate . Tenetur etiam Poenitentię Administer , naturali , divinò , & Ecclesiasticò jure , ad arctissimum Confessionis sigillum ; ad quod spectant omnia , & singula peccata , cum suis circumstantiis in confessione patefacta . Cæterum , utut perspicuè non evincatur , viguisse olim , sive apud Latinos , sive apud Græcos , formam Sacramentalis absolutionis *deprecativam* ; magis congrua , & idonea forma illa est , quæ in Latina Ecclesia usurpatur , cujus tantum ea sunt essentialia verba = *absolvo te* = Absolutionis be.

beneficium, nemini reconciliationem petenti denegandum est in mortis articulo : Quod etiam de illis affirmamus , qui, posteaquam poenitentiae signa dederunt, destituuntur exteriori sensu , ac loquendi facultate : Quinimo absolutionem, saltem *conditionatè*, etiam illi impendendam esse contendimus , qui, nullò præmissò poenitentiae signò, circumvenitur mortis angustiis, agitque animam; dummodo aliunde Vir catholicus, ac probatæ vitæ habeatur .

## VII.

Infirmis in ultimo vitæ discrimine constitutis, Poenitentiam, & Sacramentalem absolutionem petentibus, prioribus sæculis veniam non denegavit Ecclesia : Ideoque rectè se gessit Cyprianus, absolutionem lapsis omnibus, post actam poenitentiam, indulgens . Porro, cum, dimissâ culpâ, plerumque, luendæ remaneant poenæ temporales , potest , ac debet Sacerdos, Confessâ poenas satisfactorias injungere, quibus illatæ Deo injuriæ debitè compensentur : Ipse verò Poenitens, per se ipsum tenetur impositam satisfactionem adimplere . Et quamvis probabilius sit, eò tempore, quò in usu fuit poenitentia publica, Sacramentalem a peccatis absolutionem, expletâ duntaxat satisfactioe, fuisse concessam; ad substantialem tamen Sacramenti integritatem, periinde est , si absolutionem satisfactio antecedit, vel subsequatur . Denique, non omnia peccata publicæ fuere poenitentiae addicta , sed publica duntaxat, eaque canonica , nempe, Idololatria, Homicidium, & Adulterium; quibus addita sunt, temporum decursu, nonnulla alia longè gravissima .

## *De Ordine .*

### I.

**E**Xtat in Ecclesia Ordo, & Hierarchia, siue distincta ordinatio Graduum, & Ministeriorum Ecclesiasticorum, secundum quos, Divinò jure, Clerici, Laicis superiores sunt, eisque res Sacras administrare possunt, & debent. Ejusmodi verò Sacra Ordinatio, quâ initiantur Ecclesiæ Ministri, verum est ac propriè dictum, Legis Evangelicæ Sacramentum, a Christo Domino immediatè institutum; cujus essentialis Materia, est manuum impositio; Forma verò, oratio; ceteri instrumenta pariter, & verba adnexa, omnino adhibenda sint in Ordinum collatione, saltem, ut integrales Sacræ Ordinationis partes. Septem sunt in Ecclesia Latina ecclesiastici Ordines; quos inter, Presbyteratus, & Diaconatus, veram sibi Sacramenti rationem vindicant. Num verò Subdiaconatus, cum reliquis quatuor minoribus Ordinibus, inter verà novæ Legis Sacramenta, sit accensendus? ambigunt plerique; in quorum sententiam & nos profectò descendimus: At, si de Clericali Tonsura sermo instituatur, hanc omnino e Sacramentorum numero expungimus.

### II.

Excellentior Presbyteratus pars, est ipse Episcopatus, qui naturâ, & charactere, a Presbyteratu distinguitur, & verus est Ordo, verumque Legis Evangelicæ Sacramentum. Sunt itaque Episcopi, jure, ac institutione Divinâ, tum potestate Ordinis, tum Jurisdictionis, Presbyteris superiores. Ad hos autem ordinandos, plures Comministros Episcopos adhibendos esse, docet Apostolica traditio, ac constans Ecclesiæ praxis. Hinc aliter quàm a tribus, vel saltem duobus Epif.

Episcopis eorum facta ordinatio, non illicita tantum censenda est, sed irrita prorsus, & invalida: Nec quidquam sane in contrarium ostendunt a Chorepiscopis perfectæ Ordinationes; Nam, etsi Chorepiscoporum quamplurimum simplices duntaxat fuerint Presbyteri, eorum tamen aliqui, verè fuerunt Episcopali dignitate insigniti.

### III.

Sacrarum Ordinationum Ministri ordinarii sunt soli Episcopi; accedente verò Ecclesiæ, vel Summi Pontificis dispensatione, etiam simplex Sacerdos conferre potest Tonsuram, aliosque Minores Ordines. Validæ etiam sunt Sacræ ordinationes factæ ab Episcopis, quacumque hæresi, aut quovis crimine pollutis, necnon excommunicatione, aut aliâ censurâ innodatis, dummodò cum necessaria intentione Materiam adhibeant, Formamque legitimam; ipsique fuerint Episcopali consecratione præditi. Cum itaque in Parkeri ordinatione, legitima apud Anglos Episcoporum successio defecerit, eorum Ordinationes ad formam Ritualis Eduardi IV. peractas, ut umbratiles, irritas, & prorsus invalidas rejicimus.

### IV.

Solus Homo viator, masculus, & baptizatus, licitè potest & validè Sacras Ordinationes suscipere. Ipsique etiam Infantes, Amentes, alique rationis usu destituti, ordinari validè possunt; non tamen inviti penitus, & reluctantes. At Divinò jure, a Sacris Ordinibus arcendæ sunt Fœminæ; haudquaquam obstantibus, quæ in antiquis Ecclesiæ monumentis occurrunt, Presbyterarum, Diaconissarum, & Subdiaconissarum, speciosis nominibus. Ipsi quoque Hæretici, illicitè quidem, sed tamen validè ordinantur. Tandem, Ordinationis Ministri sedulò adtendere debent Ordinandorum ætatem, conditionem, scientiam, pietatem, tempus, locum, interstitia, & conferendorum Ordinum seriem: Ipsi verò Ordinandi, a ma-  
lo

Ab alio, quam a proprio Episcopo, licite possunt Ecclesiasticos Ordines suscipere.

Sacras Ordinationes suscipientibus, & gratia sanctificans confertur; & in illis peculiaris imprimitur character, cujus ratione, Ordines iterari non possunt. Adstringuntur pariter Clerici Sacris Ordinibus insigniti, quibusdam obligationibus; signanter vero in Majoribus constituti, Divinum Officium, Horasque Canonicas tenentur persolvere; quæ sanè divinarum precum institutio, nedum in Ecclesia est antiquissima, sed Clericalis conditionis excellentiæ, & sanctitati perquam accommodata. Adnexa est pariter Sacris, Majoribusque Ordinibus Lex Cælibatus, seu perpetuæ continentiæ, quam Ecclesiasticis duntaxat jure Clericis fuisse impositam, luculenter ostendit diversa prorsus, & varia Græcæ Ecclesiæ disciplina; ab eâ, quæ viguit in Ecclesia Latina. Ut res se habeat, laterem profecto lavant, & Syssiphi saxum movent Heterodoxi, qui confertò agmine, ad hanc penitus eliminandam, nervos omnes, & vires, exerunt; ut Ecclesiæ inutilem, Clericis exitiosam, statuque Sacerdotali minimè consentaneam. *Ab illis perinde est, quod illam potius emolliat, quam*

## *De Matrimonio.*

**C**UM Matrimonium, in officium Naturæ institutum, fuerit a Christo Domino ad Novæ Legis Sacramenti dignitatem evectum, ex se bonum est, honestum, ac licitum, secus ac commentum fuerint veteres Heretici. Hujus autem Sacramenti essentia, prout est Naturæ officium, consistit in perpetuo illo vinculo, quod ex pacatione externa, interaque con-



consensu resultat Virum inter ac Mulierem : Ideoque inter Beatissimam Virginem , & Sanctum Joseph verum intercessisse Matrimonium , veritas est omnibus notissima . Polygamiam successivam, iteratas nimirum a morte prioris Conjugis Nuptias, damnarunt olim Novatiani , & Montanistæ ; at ejusmodi Connubia, nusquam pro noxiis, ac per se illicitis, habitata sunt ab Ecclesia . Quare sola polygamia simultanea, contraria est Nature, atque Evangelicę Legi ; etsi cum antiquis Patriarchis, Deo dispensante, plures licitè potuerint insimul Uxores ducere .

## II.

Non solvebatur olim per libellum Repudii, Matrimonii vinculum , quod prorsus est indissolubile , nec fas erat Judæis, cum alia Uxore contrahere ; sed hoc eis Moyses indulserat propter cordis duritiam, ne exosas Mulieres infinitò odio persequerentur, vel morte afficerent . In Lege Evangelica, ob solam Fornicationis, vel Adulterii causam, nequit Matrimonii vinculum dissolvi . Solvitur tamen per Religiosam professionem, dummodo, ratum duntaxat sit Matrimonium , non consummatum . Matrimonia clandestina, semper detestata est Ecclesia, etsi valida fuerint, & rata, quamdiu ea toleravit : At post Tridentinum Concilium, non solum hujusmodi Conjugia noxia sunt , & illicita , verum etiam irrita prorsus ac nulla .

## III.

Etsi plausibilis quammaximè sit eorum opinio, qui Sacramenti Matrimonii Ministrum, Sacerdotem esse contendunt ; Nos verò, communiori Theologorum sententię subscribimus, atque ipsos Contrahentes, Matrimonii Ministros statuimus . Communiter loquendo, graviter peccant Filii, Matrimonia, reluctantis invitisque Parentibus, contrahendo ; non per hoc tamen, eorundem Parentum consensus requiri-

ritur , ut contractus Matrimonialis validus sit ac legitimus .  
 Causas omnes Matrimoniales cognoscere , impedimenta  
 statuere , dispensationes impertiri , non ad sæculares Reges ,  
 & Principes , ut somniant Hæretici Novatores , sed ad Ec-  
 clesiasticos Judices pertinet : Nec enim Matrimonium , ut de-  
 lirant Hetherodoxi , contractus est purè humanus , politicus ,  
 ac civilis ; sed Sacer , Ecclesiasticus , & Canonicus ; super cu-  
 jus validitatem , illi soli judicium proferre possunt , qui sunt  
 Christi Ministri , & Dispensatores Ministeriorum Dei , cui  
 soli Honor , Virtus , & Gloria .

## P A R E R G O N .

**N**Ec fides , neque ipsius fidei initium obtineri potest sine  
 speciali Divinæ Gratiæ auxilio , quid quid in contrarium  
 Pelagiani , & Semipelagiani deblaterent .

Homines adulti , quacumque gratia sanctificante præditi ,  
 si speciale Divinæ Gratiæ fulcimen non adsit , usque ad vitæ ter-  
 minum in bono perseverare nequaquam possunt .